

余隨侍冗翁叔祖宦游興郡倏忽兩載將去郡矣見叔祖爲政慈愛嚴明視民事如己事一片婆心萬民咸悅埔粵黔奔走學植荒蕪兼以素性迂拙從不耳聞外事諸多政蹟何能紀其巔末且就數事及同人詩詞集成一編以俟後之君子採擇並非謂敢擅於作志識者諒之

光緒九年癸未季夏月岳陽余厚墉謹記

興義府志續編卷一目錄

祠宇類

亭院類

積儲類

義學類

池塘類

廟宇類

賦稅類

戶口類

壽考類

關隘類

祠宇類

十八先生祠在小西門外馬場光緒九年知府余雲煥安義鎮總兵何雄輝合捐銀叁百兩修建亭榭池塘花木壁間鐫刻新舊憑弔詩詞頗有幽趣撥入西鄉安仁里三股井公田一所可收租穀二十市石永歸中營游擊府經歷經管輪辦祭祀通報有案

原在東門內今改爲天主堂祠後并有公屋數所每歲收租以作歲修同治間苗變無存

節孝祠在東門內光緒八年知府余雲煥建修因東門內有杜姓入公屋基一所籌款銀壹百六十兩交紳士宋杰李驥等承修計上下

興義府志續編 卷一 祠宇類

二棟兩廊房間祭器俱備通報有案

原在東門外文昌祠側同治間苗變焚燬無存

湖廣會館在北門外光緒五年知府吳宗蘭創建下殿三楹八年知府余雲煥建修大殿五楹廂房花廳頭門圍牆俱備正祀大禹附祀濂溪壽佛諸神

原在北門外名三楚宮同治間苗變燒燬無存

前署知府李公專祠在府署左後同治五年三月初十日回匪襲城殉難於何家井經回酋馬子玉墜軀於西門外志有石碣嗣由屬紳劉官禮等謀竊骸骨送寄家屬十一年城復事

閏十月初四日奉

上諭李保衡著追贈道員交部從優議卹並准其建祠欽此維時同

殉難之冊亭州同李華斗江西人經歷徐海江蘇人均附祀光緒二十九年屬紳劉官禮捐銀助修祠宇時公子大椿以普安同知調署知府出資添補三十年五月祠成詳

奏列入祀典春秋致祭其淺瘞處亦封植立石以留忠跡云

廟宇類

關帝廟在北門外光緒七年三月內被火災下棟焚燬九年知府余雲煥籌款銀壹百兩移交安義鎮周壽昌派員督修通報有案

龍王廟在東門內光緒九年知府余雲煥捐廉并諭住持募貲重建城隍廟在總兵署前左光緒八年知府余雲煥修葺一次并添修十殿神像通報有案

火神廟在南門外光緒八年知府余雲煥籌款銀壹百二十兩并廟內存項移交安義鎮周壽昌派員督修仍復舊制通報有案

原在南門外光緒六年被火災燒燬無存

馬神廟在小西門外馬場光緒八年安義鎮總兵何雄輝率合營將弁捐貲重建知府余雲煥撥入苟廠塘大龍井屋基壹坊田壹坊共

十二坵每年納秋糧穀貳斗約收京斗租穀
作歲修之費

石歸廟內經營以

原在小西門外馬場同治間苗變無存

亭院類

申明亭在東門外鼠場光緒八年知府余雲煥建修每值場期奉教
官經歷諸生宣講

聖諭并撥入北鄉阿棒柴壩坎田一坵兔場了口田二坵那腊田一
坵喬心田一坵收租穀六京石又撥入南鄉木咱寨紅稗陀陸地一
股屋基對門山林脚田五坵水井路坎脚下田二坵收京斗租穀
石歸經歷司經營以作歲修之費通報有案札經歷司查明租石

尙未覆稟

養濟院在北門外光緒九年知府余雲煥捐建老額發孤貧口糧四
名在官莊米石項下報銷歷任以來每歲捐廉添養四名共八名由
府署每月每名發給京斗米叁斗通報有案

原在五洞橋東同治間苗變無存

演武廳在小西門外馬場光緒九年知府余雲煥籌款銀壹百壹拾兩移交安義鎮何雄輝建修每逢場期知府率教官經歷諸生宣講聖諭通報有案

原在小西門外馬場同治間苗變無存

賦稅類

實徵秋糧米原額三千二百一十二石九斗九升七合八勺五抄耗米四百八十二石四斗三升二合八勺改征米三百三十三石一斗三升一合九勺同治間苗變征收不能復額光緒八年知府余雲煥稟請藩司委員清查釐正厥冊以復正額通報有案

地丁銀原額三十七兩八錢六分五釐耗羨銀三十五兩七錢二分五釐八毫同治間苗變征收不能復額光緒八年知府余雲煥始得全數征解通報有案

鹽課銀原額一百六十六兩九錢一分遇閏加征一十三兩九錢一分同治間苗變征收不齊光緒八年知府余雲煥始得全數征解復額通報有案

魚課銀原額一十二兩同治間苗變不能復額光緒八年知府余雲煥始得全數征解通報有案

牙帖銀以前當課銀當帖銀鹽斤牙帖銀棉花牙帖銀銅鉛雜貨牙帖銀兵燹後一概無存近有胡太和鹽行帖每年完銀二兩五錢光緒八年知府余雲煥始得報解通報有案

積儲類

社倉分建四鄉各寨東鄉八寨十廩存穀四百二十石西鄉七寨九廩存穀四百八十一石南鄉一寨三廩存穀四百二十二石七斗北鄉七寨十四廩存穀八百二十四石六斗共倉三十六廩共存市石穀貳千壹百四十八石叁斗合京斗四十二百九十六石六斗光緒九年知府余雲煥倡捐通報有案

戶口類

興義府戶口光緒七年知府余雲煥編查保甲本城四鄉共壹萬壹千八百一十一戶男女丁共五萬零五百三十口此兼漢苗總計之數也

義學類

育才義塾在屯脚光緒九年知府余雲煥建修因屯脚原有絕產可收京斗租穀六十餘石歸入文昌宮復據該地紳士胡克義等稟請撥歸屯脚以作義學膏火通報有案

壽考類

張王氏係貞豐州民王天培之女張世誠之妻張福恩之母乾隆四十四年生迄今光緒九年尙存現年壹百零五歲貞豐州牧屠漢章請

旌在案

池塘類

鎮火池在府署花廳前光緒八年知府余雲煥因城內多火災於廳前鑿方圓二池并諭居民于街巷多置水缸鎮之火災遂斷有詩紀事泐石碑豎池邊

關隘類

花江巖在貞豐州城北九十里山高路險不利輿馬光緒八年安義鎮何雄輝捐廉籌款修理西路九年安義鎮周壽昌捐廉籌款修理東路并修渡船知府余雲煥捐銀五十兩現在修理尙未竣事

興義府志續編卷二目錄

藝文類

弔明十八先生墓

弔明十八先生文

過十八先生廢祠

重修十八先生祠作

弔十八先生

謁十八先生墓

過十八先生祠二首

又

又

又

興義多火患一月凡數見因諭居民鑿池徧街巷郡解無井新

闢方圓二池落成口占二絕句紀事

次韻

又

春日鳳笙丈偕同人登半山亭亭瀕郡之綠海荷開時紅遍六

十里皆花惜亭圯太守擬修葺之爲公餘小憇之所

荷花生日隨冗翁叔祖偕同人至半山亭賞荷有作

湖廣會館碑記

登桅竿山雜詠四首

秋日城東閒步

詠雞墪菌

九日登桅竿峯

題鳳笙盤江送別圖三首

去郡有日矣徐芷沅教授爲畫盤江送別圖并繫三詩依韻和之

明十八先生祠記

前興義府李公專祠記

張秀姑詩有序 十二首

南籠紀事

頌郡侯余鳳笙先生新政

又

又

擬楚祠

又

客有自南籠來者具道余鳳笙太守新政因倣栢梁體以紀其事

張秀姑行

又

詠張秀姑讖呈鳳笙師二律

古歌一篇奉寄鳳笙太守

長歌一首呈鳳笙太尊

張娥行

張女行

張黃訟平偶紀六絕句

詠張秀姑詩四首

奉題鳳笙太守判張秀姑事調寄賀新郎

附聯語

試院聯

府署聯四

湖廣會館聯二

養濟院聯

申明亭聯

十八先生祠聯

又 又 又 又

岳陽余厚埔輯

藝文類

弔明十八先生墓

秀水 舒位 錄雲

藐諸孤叢爾國天荒荒地窄窄十八人罹此厄計雖非氣自直同日
死異代惜田橫島孟嘗客彼三千此五百黃土黃碧血碧秋風楊春
雨麥我從軍弔遺跡短歌行長嘆息 見版水齋集

弔明十八先生文

桂林 韋業祥 伯謙

大清順治十有一年夏四月故明大學士吳貞毓等十八人謀討逆
臣孫可望不克死之十八人者贈少師太子太保吏部尚書中樞殿
大學士宜興吳公貞毓刑科給事中寧國張公鐫武安侯中軍左都

督欵鄭公允元大理寺丞湖廣林公鍾太僕寺少卿袁州趙公庭禹
檢討晉江蔣公乾昌善化李公元開吏科給事中江西徐公極江西
道御史錢塘周公允吉廣西道御史南昌朱公議景福建道御史進
賢胡公士瑞兵部郎中內川朱公東旦工部郎中九江蔡公續主事
廬陵易公士佳員外郎鄞任公斗墟主事李公欣太監張公福祿全
公爲國也初明亡永明王假號粵中燮於我 大軍西徙安隆就其
降將孫可望可望驕不臣王憂懼語福祿爲國欲倚晉王李定國制
之於是貞毓等謀以王令召定國兵入衛而兵科給事中靳容林公
青陽請行久之事洩可望執貞毓等嚴掠之十八人者並從容罵賊
死嗚呼烈矣傳有之曰臣竭其股肱之力加之以忠貞其濟君之靈
也不濟以死繼之夫明裔數蹶永明一線燮在遐邊此其勢不待智

者而決之也彼十八君子者獨竭心所事而成敗利鈍有弗計焉不
庶幾無忝於忠貞而克善其死者乎觀貞毓之言曰結定國討可望
者貞毓也諸臣無與續則曰今日續等必承此獄以見臣子報國苦
衷由是衆皆承吁謂非勇於爲義當仁不讓而有是也今諸臣往且
二百年矣而流徽遺教足以激義而勸忠曩嘉慶之初苗變倉猝郡
官民猶有能守土完忠以上邀 聖主之褒嘉而爲郡永此令名者
不可謂非諸君子扶衰起懦有以肇於前也十八人既死事家人合
葬於馬場青陽以奉使後至亦死之塋于所乾隆中

高宗純皇帝褒悼勝朝殉節諸臣賜貞毓曰忠節鐫至斗墟十四人
暨青陽通諡烈愍於是學使洪亮吉知府曹廷奎修其墓沈越記之
中更燹亂樵禁弛焉業祥奉使是邦循眺遺墟殘碣遺文闕焉莫續

心滋惡之乃表其概而繫之銘曰

明綱中弛不再延千鈞一髮誰幹旋忠肝塗地莫回天馬場凝碧生
蘭荃飛燐夜照靈旗還鳴咽往事傳嘯鶴一蝸之角國其顛安龍餘
喘吁可憐太阿已假權奸權前籌孰策屠王虜蕭牆况乃荆棘纏吁
嗟公等何拳拳欲除梟獍調鷹鷂社稷苟利他何牽天乎不欲明祚
綿金甌碎矣無瓦全英光宵燭箕斗躔一笑十八頭顱捐求仁而得
奚怨焉配義無佞眞浩然公乎何恨賈重泉奸雄卒亦溝壑填褒忠
聖代恩猶宣後來觀者其審旃牂柯之嶺盤之川千秋長並厓山傳
司牧勤護三尺阡來者憑弔爲流連靈兮莫接天路過大荒披髮空
涕漣鐫珉再拜將吾虔教忠可以千萬年

光緒五年夏五月貴州學使韋業祥拜撰

過十八先生廢祠

岳陽 陳壽麟 雪芝

命畀於天還之天身養於國還之國文章有神交有道誰忍獨生誰
不活誅莽存漢劉季心二十八宿風雲合南籠一撮來勤王碧雞無
靈龜不答有明末造天爲烏瑞黨誠難緩戮屠張李萑苻草竊耳兇
鋒虐徹逼天衢數萬淨軍密獻鎗羽林誰捐干城軀神州既陷皇子
逃福王恩恩賢南都張復據蜀海內沸何有於天末烏蠻之一隅史
閣部公神不助狗命阮馮偷眼覷報書懷懷鑑淮河是時復社東林
之義其最著窮邊骨肉在斯文玉步忍覩更義馭慈雲蒼蒼吳月沈
南藩肯把降旗豎孫可望彼何人桂王借箸竟胡秦官家舊地縱式
廓奢香九驛悉荆榛相有謀將無語事成王福禍臣處自吳暨全十
八忠四月八日天鼓轟轟落紅雨斫他郅支頭不見飛將軍右袖七

首圖終見左椎博浪無斧斤仰天一哭時哉命今夕何夕鴉冠藉兔
闌賦雪枚乘流雞距草檄子安輩孟嘗之客田橫島不必三千五百
鐵骨碎宮殿灰燼盤江澗生則猗裳死聯襪思陵地下應相親笑勝
當日殿上趨儒臣無慮王爲朕殲士爲朕殉繁何瀛洲之舊數乃自
萬里來彬彬 聖朝版圖特邁古典禮優及三股仁恪有奉兮墓有
表發幽慰隱無遣人先生遺跡今興義小醜跳梁又幾次南皮太守
翩躚來築先生祠安神位石亭池榭水亦香薦以菡萏雞墜羊菌土
產之聊備猖獗之徊復背叛巢穴此地十餘禩先生大名得其時朕
蠻若不得其地仰挹靈芬增歎息頽垣空被春山翠君不見濟火廟
與竹王祠杖印竹而來者胡爲紛紛競逐羅施戲

重修十八先生祠作

岳陽

余雲煥

完翁

天福窄地鴻荒天荆地棘日色無光皇帝后妃乞口糧臣蒙於君國
之禮君養於臣國乃亡君不見孫可望永明王一解天不祚兮龍爲
魚賤權已攬兮鼠忽虎變禍伏蕭牆堯舜受禪我欲誅之恨無博浪
椎荆軻劍二解若草詔書若齋詔旨包胥乞援乃哭向桂林之野灘
江之沮事成無功事敗死不與同心如白水三解消息阻兮君后憂
機事不密誰洩其謀管仲檻車箕子囚黑獄興矣先生休四解七字
詩錚錚鐵八字獄滴滴血無論冤不冤曰承殺便殺五百壯士死田
橫嚴將軍頭常山舌水歷八年四月八五解郿陽有花翳風雨銅雀
有臺荒歌舞不信權奸空跋扈算來不及忠臣荒墟一坏土六解羌
有祠兮南皮太守築傷兵燹兮蓬蒿簇簇猩廳嗚兮鬼夜哭移建奠
楹山之麓雲車風馬迎魂速盤水江變爲陸桅竿山遷爲谷先生之

名萬劫不屋七解

弔十八先生

襄陽 劉丕助 續堂

勝朝鞞轂起煙塵大獄含冤十八人蠻野同時埋碧血馬場共穴閃
青燐捐軀浩氣冲牛斗罵賊豪情動鬼神報國愚忠傷命絕臨刑幽
憤乞天伸風雷震烈驚奸宄雲日慘昏泣蓋臣草檄兵援猶望蒼蒼
牆禍伏不封秦修文合是瀛洲士誕佛應爲羅漢身死視如歸生若
寄孟言取義孔成仁魂遊上界乾坤老諡 賜當陽雨露新此後隴
樵嚴例禁千秋俎豆享明禋

謁十八先生墓

岳陽 余厚塘 際甫

馬場古墓漫相尋憑弔孤忠感不禁逃竄誤投邊徼地匡扶誰識老
臣心外援不至機謀洩內患難除黨錮深明祚欲延天命去甘爲厲

鬼殛强秦

臨刑詩句藏衣帶浩氣彌漫入太空當世豈無人逐鹿傷心容有地
安龍明知此事終難濟不忍君王守死窮讀罷殘碑重歎息英魂猶
擁夕陽紅

過十八先生祠

禮陽 周傳鎬 潤東

孤城斗大困邊陲翼載辱王事未休天欲祥明應悔禍兵如得粵可
成謀上方借劍誅奸黨博浪空椎累主憂儻使先生都不死偏安猶
與奠金甌

外援長阻泣孤臣可惜田橫壯士身正氣歌殘方浴佛斷頭擲去已
爲神冤沈綠海波猶撼血染紅江草不春天榜山前魂未散新祠承
祭薦芳蘋

興義府志續編

卷一

藝文類

五

清州文通書局代印

平江 余昌瓚 蓮秋

王綱已墜無完土君弱臣强鼠變虎老奸翼之走安龍已受秦封奚
跋扈十八壯士奮孤拳求兵西府涕淚漣事成事敗未可料此意茫
茫問蒼天無何大獄猝然起事機不密乘奸充靡他矢志不可搖一
十八人同日死先生方臨刑神志何清明先生各賦詩視死只如歸
吁嗟先生骨已朽忠魂猶繞城南阜吁嗟先生祠已荒斷碣殘碑古
馬場桅竿天榜山崔嵬重新廟貌魂歸來豈惟俎豆馨香視要使頑
廉懦立聞風興起無委蛇

正安 徐以清 並填

十八先生爲國死萬古綱常皆如此二百餘年拜新祠忠烈之名滿

人耳

一代孤臣恨無如十八忠援兵待西府翼戴困南籠國運誠難挽天心不可窮殺身留節義灑淚哭英雄古墓桅竿麓芳名史冊中郡城新廟貌勁草返頽風

興義多火患一月凡數見因諭居民鑿池徧街巷郡解無井新

闢方圓二池落成口占二絕句紀事

余雲煥

炎曦皜皜照山巔熒熒星飛參井躔萬戶瘡痍誰拯救盤江霖雨盼年年

手闢芳池地數弓愧無涓滴潤民窮他年如續南籠志記否經營自

冗翁

次韻

善化 張 綯 原素

興義府志續編

卷一

藝文類

六

興義府志續編

慈雲遍覆九峯巔熒熒何因守歲躔分與萬家功德水紡車聲似慶

光年

黔南識略稱嘉道間郡中苗婦多勤織紡車之聲絡繹于午夜月明時云

方流圓折飲天弓陰火熒臺鏡已窮五袴似聞歌蜀郡雙池猶得擬

坡翁

余厚塘

一弓隙地曲池開半為栽蓮半禦災政罷閒吟頽小立輕拋花片逐魚來

萬家兵燹劫灰中爛額誰為補救功挹彼盤江盈勺水化為霖雨潤

南籬

春日鳳笙丈偕同人登半山亭亭瀕郡之綠海荷開時紅遍六

十里皆花惜亭圯太守擬修葺之為公餘小憇之所

抽閒塵脚踏青霞何必蓬壺始泛槎倒影不流涵井鬼荒茆自昔藪
龍蛇幻經甲子添桑影雄接昆明問翠華晴色沙灘灘上草年年人
坐浣春紗

好事名流悵已空

譚張春太守

石魚猶見躍波紅未從香國修花史苦向

蠻天問信風愛世自憐同甫輩放懷誰識北溟翁邕州馬退傷陳蹟
佇望詩亭罨畫中

荷花生日隨完翁叔祖偕同人至半山亭賞荷有作

余厚塘

萬峯層疊翠成堆紅藕花香雨後開避客野鷗眠石畔浣紗苗女坐
山隈相逢峽蝶尋芳去又見蜻蜓點水來一櫂漁歌驚乍起夕陽斜

影照青苔

荒亭劫火痕猶碧荆棘難除亂石中參井星躔多水潦粵黔地界劃

江紅幸逢詩吏添新制

叔祖擬修葺之

徒悵名流已屬空

譚張春先生

歸趁月明

瞻北斗廿三度已近蒼穹

湖廣會館碑記

余雲煥

興義之有湖廣會館也肇自康雍之世以前原委無從考證道咸間
鄉之人在郡者以年深日久棟宇朽折斂費重修規制具備逮同治
大亂燬於兵燹十餘年瓦礫荆榛過其地不勝黍離之感吳菊莊太
守蜀人也來守是邦溯其原籍實出耒陽恭敬桑梓亟思恢復舊制
廟故祀神禹就舊基督飭創建下殿三楹工未竣旋調任去經理者
不得其人仍就廢弛光緒辛巳秋余奉檄權郡篆盡然傷之因與鄉

老謀所以剔除積弊之法別擇紳董且籌經費修復大殿五楹廂房
頭門圍牆花臺越一年而成癸未仲春凡大湖南北在郡之官商幕
以及新舊占籍於斯者同時畢集讌飲懽呼致足樂也余乃進諸君
而語之曰楚爲人才藪湖廣屬楚地洞庭衡嶽鍾其秀沅芷湘蘭挹
其芬自古忠義理學歷時輩出晚近以來侯伯子男不勝屈指故吾
鄉人之散處於外皆有鄉祠黔南僻處天末與郡界滇粵萬山中劇
亂二十年以人迹罕到之地變爲衣冠萃處之庭洒綠燈紅念故舊
談山水益徵鄉誼之足重諸君勉乎哉舊廟並祀文昌關聖諸神像
今正祀大禹附祀濂溪世傳壽佛出衡州說雖不經亦沿舊附祀從
鄉人之請也此外諸神各有專祠不並祀於廟中是則區區之本意
其與斯役者總管李君驥何君文光之力尤多例得並書光緒九年

興義府志續編

卷一 藝文類

八

五月知興義府事岳陽余雲煥謹撰

登梳竿山雜詠

陳壽麟

曲磴懸天怯霧封荒屯廢寨徧雞蹤清紅江界分滇粵犴豸峯窆穴
蟻蜂流寓半爲獠硿塔逃亡都假練軍容招公隄上行人少刀劍環
腰是惰農

金鐘銅鼓臨城隅靈響沈沈入夢無羊却冷灰喬木少馬場陰雨烈
魂孤故宮地駐將軍節新獄民輕嫁娶圖腥穢不堪餘草樹清風愁
問尹家儒

雙開前指石門關一道霞烘楚客顏詩偏地名憐獨雋參軍音語苦

沿蠻彈琴曲問周張後周馥聯與張春潭兩太守峙鼎人宜沈宋問謂余鳳

淹中新嚮化合將此地當岷山余太守現將當道謂撫綏之後宜振興文教暫就各府創建書院探買書

籍延請名師漸次及於州縣如不易吾言誠苗
蠶之福而文翁講治之深心亦藉茲稍慰矣

縱橫楊墨唐梁佛事在如今最太平天眼忍看夷變夏氓蚩况值口
餘生萬金有產逃官籍三事雖修苦戍兵欲上籌邊樓上望諸公何
以頌清明

秋日城東閒步

余厚墉

桅竿峯麓晚風涼異地閒游客思長雞菌漸生分赤白瘴煙初起辨
青黃珍珠泉湧推龍井忠烈魂留瘞馬場綠海漁翁真快事賣魚沽
酒醉斜陽

詠雞縱菌

余厚墉

宜雨宜晴值仲秋一肩香菌遍街遊雞形垂羽惟高脚蠶穴抽芽獨
繖頭瘴嶺人來何簑笠蠻家客至當珍羞牂柯飛渡管嘉味動我尊

興義府志續編

卷一

藝文志

九

鱸興未休

九日登桅竿峯

余厚墉

風斜雨細重陽日著屐來登第一峯石屋高低歸眼底浮雲來去納
胸中萬家烟火兵氛淨一樹榮枯造化功手摘茱萸除瘴毒此身不
念念民窮

題鳳笙盤江送別圖

徐以清

近接棠蔭將及兩年依戀慈雲正深孺慕倏爾驪唱倍切蟻
思謹寫盤江送別圖一軸并擬七律三章以送別亦聊使異
口披圖如見面云

近托幘幪已二年遭逢差幸有前緣官如冬日人同愛士上春臺我
更先萬口喁喁碑載道一心耿耿鏡當天攀轅莫挽霓旌住安得隨

輪効執鞭

再造盤江報政還福星一路耀黔山甘留南國棠千樹暖庇西堂厦
萬問巨眼已曾觀世熟蒼生何肯讓公閒 九重有 詔褒賢守憂
樂從知天下關

風度翩翩鶴與琴催科撫字倍勞心同舟雅頌承平調匝路謳歌愷
悌音綠海萑苻今已靖紅江桃李正成陰披圖省識官民意欲戀離
筵酒再斟

去郡有日矣徐芷沅教授爲畫盤江送別圖并繫三詩依韻和
之 余雲煥

張翰解印在秋先作郡蠻疆已二年嘗指鼎鼐知宦味息機馳馬避
塵緣與歌誰嗣聽前路 褒詔驚傳下九天 奉 上諭貴州候補知
府余雲煥實心任事著

興義府志續編 卷一 藝文類 十

有成效深謀
嘉尚等因 恩遇未酬身未暇策動猶取老鴛鞭

倦鳥孤飛苦往還輕裝檢點度重關飲餘杯勺盤牂水看飽西南浪
粵山報政只堪書下下歸田那得賦閑閑金鐘勝地桐鄉路百歲神
遊盍此間

玉臺新詠八瓊音響過行雲欲和琴妙繪競推王米手名花供養佛
仙心披圖陳迹重重記醇酒離亭細細斟慙愧百錢諸父老南籠俗
美似山陰

明十八先生祠記

國社將屋主弱臣強窺伺神器者靡有所底忠義之士憤起爭之而
天之所定卒無可補然皆以死繼者君上之德固不能忘而非是天
下又安有綱常也顧彼跋扈不臣者亦不旋踵滅亡脫非屠害忠良

共翊王室則天命詎不可以復承後之人尙論前事莫不痛恨權奸而於死節孤臣且哀其心力已瘁遭遇甚窮思表揚以勵後世即就所死處立祠祭祀馨香勿替然則天於忠義之士不成其謀命固有屬而所以報之千秋者其道非昭然不爽歟明末永明王有忠義臣十八人明永歷八年爲我

朝順治十有一年四月初八日因調西藩晉王李定國入衛討權奸孫可望事洩同日死於安龍之馬場今貴州興義府是也十八人首宜興吳貞毓贈少師太子太保吏部尙書中極殿大學士也次刑科給事中甯國張鐫武安侯中軍左都督欽鄭允元大理寺丞湖廣林鍾太僕寺少卿袁州趙賡禹檢討晉江蔣乾昌善化李元開吏科給事中江西徐極江西道御史錢塘周允吉廣西道御史南昌朱議泉

福建道御史進賢胡士瑞兵部郎中四川朱東旦工部郎中九江蔡續主事廬陵易士佳員外郎鄧任斗墟主事李欣太監張福祿全爲國初可望擁重兵跨有雲貴地永明在廣西之南寧受困於我大軍猝奔龍英旋移駐安隆依可望可望故流賊也心懷篡逆馬吉翔馬雄飛龐天壽冷孟錐吳象曦王愛秀朱企鏐張佐辰鄭國蕭尹等爲之爪牙永明憂懼謀諸福祿爲國兩人欲假西藩兵收可望順治九年十一月貞毓等請王密詔飭給事中林青陽持往定國營復鑄屏翰親臣金印命翰林院孔目周官賞送之吉翔奉使南寧祭桂恭王及桂恭王妃墓廉知其事密報可望尋與諸奸黨百計傾軋十八人十年三月初六日鄭國等收十八人於獄刑訊蔡續知事無救不得已承之但不言主上知悉鄭國遂以欺君誤國盜寶矯詔八字誣十

八人報可望可望令下奸黨挾水明御殿定罪以張鐫張福祿全爲國爲首凌遲處死其從蔣乾昌等十四人皆棄市惟貞毓以大臣故賜絞明年定國人衛護水明走雲南遣使祭十八人立碑馬場題曰十八先生成仁處聞十八先生被執承案疾風迅電忽然變作臨刑望闕叩頭從容賦詩忠義之至朝野感泣然而賢人既死國祚徐亡十八先生之所繫固甚重也嗚呼豈非天哉昔趙貫高謀殺高帝不遂被逮歷受刑慘卒不肯言王反若十八先生者甘受矯詔惡名固猶冀存王旦夕待西藩兵至殄滅可望其忠君愛國之心曠代同也嗟乎水明不能誅天壽吉翔中興事業無復可望豈待八字獄成而後知哉然使十八先生竟因吾王孱弱不思恢復則如奸臣所謂順天者曷由起人觀感乎

高宗純皇帝褒嘉前明死難諸臣貞毓
賜諡忠節其餘通

諡烈愍舊有祠在興義府東門內知府南皮張鏞建修同治間苗變毀之今西洋所立天主堂其遺址也光緒八年吾叔亢翁守興義日與居民宣講忠孝節義實處政令既行上下親信公暇輒置酒弔十八先生墓嘆祠宇之不修念忠魂之莫妥迺商之安義鎮總兵何公雄輝合出白鏹三百兩明年改建祠於小西門外馬場以西鄉安仁里三股井入官田一所隸人計租穀四十石通報立案歸中營游擊及府經歷掌守主祭祀祠外亭榭池塘花木畢具壁間鐫刻古今詩詞而未爲之記今春愴隨宦來黔叔父命承此闕愴嘗讀明史至崇禎十七年莊烈賓天竊嘆當時朝廷大權既歸奸佞徒令忠臣義士

死節殆盡永明遁處遐方十八先生從之冀倖中興而又爲可望所害皆天也顧我純皇帝猶訪求

賜諡後來守土者登新廟貌俎豆永隆此豈十八先生在天之靈所敢望乎然而忠義之爲人重也固如是矣光緒十年甲申孟秋月平江余惻謹撰

按明陳枚庵御史啓相有弔吳忠節貞毓鄭武安侯允元詩載吳鄭二公楸合葬安龍城西海源寺後則今興義馬場十八先生墓蓋統名之也二公實不在內啓相字枚庵富順人官至河南道御史祝髮爲僧居遵義著平水集數百卷與十八先生共事永明見聞旣確似無疑義題云吳相國貞毓夫人裴子戩穀鄭武安侯允

元夫人鄧移吳鄭二公楸合葬於安龍城西海源寺後弔之以詩燼灰冷作一瓶收送上荒原源海頭天府星殘埋二曲遼東鶴返泣千秋雨中昏夜催人去夢裏空山付鬼愁眼底鬚眉今略盡更將忠義向誰籌余由黔返湘乘輿方駕適吾叔讀莫子偲黔詩紀略得枚菴此詩喜不自勝謂守興義兩載未嘗至海源寺後尋訪忠義遺蹟二百年來無人破此疑竇可勝感喟因命附紀所撰記後倚裝書此以補前闕且待後之作者光緒乙酉岳陽余惻勤夫謹撰

前興義府李公專祠記

嗚呼咸豐同治之際回夷各匪蹂躪滇黔守土將吏或猝及於難倖得褒錄者何可勝道若夫明知虎狼窟宅任大難蹈至險祇知有國

有民而不知有身如吾師莘農先生誠足壯也公諱保衡浙江會稽李氏由附貢生敍訓導援例同知留黔補用同治元年署普定知縣值貞豐回匪陷歸化蔓及縣境公率團堵截賊敗去未幾髮匪逼城公籌餉設防屢獲諜問賊以不逞二年匪首何二竄擾復督兵迎擊殲賊數百人三年調署鎮甯知州練鄉團詰內奸爲堅壁清野計賊不敢犯公由是以知兵名當是時滇黔遍地皆賊官軍攻剽腹地日不暇給沿邊各屬未遑兼顧吾郡毘連滇粵尤爲兵力所不及回夷巨黨盤踞其間叛服靡常郡守多爲鉗掣類於囚拘大吏才公檄攝郡篆旋舉循良專摺保知府四年六月丁父憂大吏以回夷初平貞豐未靖奪情留任蓋欲依公澹西顧之憂矣初公赴任募敢死士數十人取道新城新城爲回酋金阿渾所踞名反正陰蓄髮存異志

聞公至閉城以拒公至城下呼金出見示以威信金感服立薙髮就撫時安義鎮總兵以降酋馬忠代辦與守同城縱部卒爲暴民不堪命公陳說利害忠悔悟部卒稍斂流亡歸集者數百戶明年公以貞豐回酋馬冲久負隅檄守備劉萬勝等分路進剿匪目張覆陰等率悍黨四千餘人暗集夷目楊阿泥等合力來拒截圍我軍於廟頂三道溝其別股復進踞八達普坪黑夷王罰備實與賊相首尾勢張甚公調册亨營都司熊忠等設伏截擊殲僞將軍楊阿馬僞翼長姜罰薪斬首一百五十餘級賊大敗狂奔自踐死者約千人劉萬勝亦乘勢擊退廟頂之賊合師攻八達賊遁去我軍進攻普坪罰備詐降誘馬忠受降新城公知其詐勸勿往忠弗聽至新城而金阿渾復叛與罰備合遂害忠劉熊各軍聞變驚潰賊箠復城公急調興義普安兩

縣率團來援未至賊已逼城下公率衆登陴爲死守計或請曰事急矣盍突圍出合援兵再圖恢復公曰援兵爲城計也棄城而逆援援至無城矣出城一步非吾死所人遂無敢言去者會忠部降卒與賊通城陷公率數卒巷戰力竭被執挺立罵賊遂遇害賊感其忠祭瘞如禮並以短碣志之同死者府經歷徐海冊亭州同李華斗時五年三月初十日也公部將謝清恩來歸官禮遺覓公骸還公家屬送之貴陽十一年郡城復事

聞十月初四日奉

旨贈道員給騎都尉世職襲次完時以恩騎尉世襲罔替並於死事處及原籍建祠徐海李華斗均

贈官附祀光緒二十年巡撫崧公蕃列公服官政績死難事實奏請

宣付史館得

旨俞允距公守郡之三十八年長公子仙逋太守以普安直隸應同知來署府篆興學校詰奸惡繼先人未盡之志民咸戴之乃營地庀材爲公建祠於府署之左二十九年六月興工越明年五月工竣屬官禮爲記官禮忝列弟子深悉顛末罔敢辭讓竊慨晚近以來利害之見中於人心害僅毛髮卽引身爲自利之計者比比皆是公之丁父憂也哀戚盡禮民感其孝使匍匐奔喪誰復以畏葸相誚其不肯拘牽禮制以避艱危者蓋見降酋帖耳時不可失欲爲

國家奠此土安此民也卒之變起倉卒慷慨以死嗚呼可不謂忠耶敬爲揭其大節昭示來禩以永郡民之思更述其施之吾家者附以銘詩藉達官禮之耿耿銘曰

昔我伯氏嫉惡如仇統游擊師鋤彼蠹蟲有李鳳才倚賊爲重以梟
戕鸞直莫能訟我公蒞止爲白兄冤公義既伸賊弁就殲我聞公言
吾無私耳扶持正氣職分應爾公之浩氣彌綸大字公之精靈長庇
吾士民戴公德如受私恩於萬斯年俎豆聿新

雲南候補道門人劉官禮謹撰

張秀姑詩

有序

岳陽 陳壽麟 雪芝

秀姑黔之興義人才貌雙俊父業銀工鍼術外學其技殊精緻稍長
議昏者踵至父母令白擇少許可一日其母私語之曰昨見鎮標營
弁黃氏子年少善騎射頗英偉盍許之秀不應未幾母病危潛令速
黃來秀姑私窺之始決而委禽焉天主教黨李某豔其色以重金啗
其族某謀賴婚黃憤控於郡守屢訊不結會余鳳笙太守權郡篆廉

訊確情斷秀姑歸黃氏子賞以匾貲當堂成禮迨吉有日居無何教
黨之張五逼秀姑斷髮爲尼其父復偕塔鳴冤太守怒遣健役至教
堂逮張五嚴笞之秀亦踉蹌至髮毵毵覆額顧其志仍無他也曰適
誤人言致一時舛錯耳太守憫之命老嫗扶入內署夫人爲製鬘女
公子輩脫簪珥助香粉更衣飾妝畢乃從容謝曰蒙夫人援手之惠
是種種者得毋不我久假抑餘波及妾不還在筓耶夫人溫諭而笑
遣之出復以執事鼓樂送歸黃宅卽於是晚行合卺禮時光緒辛巳
九月既望秀姑年十有六初秀之入白雲庵也頓自悔陰遣說黃昇
之歸黃不可曰有郡侯主奚事躁爲訟平郡民交相賀士林以詩歌
詠者盤山綠海間幾徧余至興稔其厓末因慨薄命人天涯零落大
都如是作詩十二章

浪傳佳話徧南籠秀毓蓬門窈窕風狼性貪淫甘化外鳩睢好合重
閩中煤檀搗處歸香窟媼士搏來補化工能使神仙成眷屬風流誰
繼曲江翁

叔鸞擇婿抑何艱兒亦矜矜惜翠鬢嬾學東家窺宋玉從無朝雨下
巫山紅江香透青簾細綠海春含碧玉彎多少金龜緣太淺懷人心
事幾闌珊

美少誰家不解愁久聞佳種將門留駿騎得意郊行獵猿臂何心相
必侯楊六蓮花難見面東阿繡枕敢輕投記曾母病焦思口射雀屏
前一相攸

桃李無言雪玉膚此身已許子南夫網羅休問南山鳥聲價從誇合
浦珠箱裏裁將紅豆曲花前妬殺紫騮駒如何鸚鵡貪人飼惹得鴿

鸚早覲觀

楊枝無力肯隨風幾似玉嬌惱畫工夢好鴛鴦猜斷續穴深狐兔伏
西東空闔淚慘傾同蠟短後衣單信絕鴻消息更驚風鶴裏卜將釵
股向燈紅

太守新來趙忤賢手持冰鏡拭飛煙奇冤半屬傾城負好事難邀俗
吏全四畏金辭清夜客三章詩補標梅篇黃堂鐵案如山立貪看蟾
蜍十五圓

何物鳴張漏尾魚覆雲翻雨玩前車綠珠可逼當樓墜斑血難移皎
日初三尺油絲拚一剪萬條愁緒倩誰梳焚琴煮鶴情同忍甘借空
王半壁廬

絮果蘭因付渺茫彩繩愁帶瑞雲香卻離苦海千般黑誰護慈雲一

片黃瀕死未須同情女再生應是約章郎取金跳脫頻摸弄曾否溫
臺一夢涼

忽傳拘得虎倭來赤髮黃睛懾震雷官票無情清藪澤祇林一度當
輪迴啼痕再拜低眉佛禿頂傷經浩劫灰妾有癡情石不轉燒香猶
上望夫臺

鶴俸分餘作嫁衣夫人製鬢翠成圍權爲紅葉將韓去也當黃金續
祭歸佳兆虎頭容一卜歡情燕子已雙飛尋常花燭緣徧巧免使才
人賦洛妃

鼠牙誰謂女無家一紙冤沈海底沙縱道樂昌分鏡恨翻疑紫玉夙
緣差紅顏掠鬢防秋早青柳登樓望眼賒夫婿不明儂意苦金鈴遲
卻護香花

一番公案一詩葩餘綺層層散紫霞判牘駢文應笑草司香仙尉有
閒花雪兒若善歌金縷紅線還堪署絳紗千載棠陰談韻事放翁圖
畫徧人家

南籠紀事

古羅

吳佳駟

金縷誰家曲聞歌最愴然天多尤物禍人結再生緣幾墮靈芸淚曾
參玉版禪貞情一封髮可奈禿嬋娟
奉聖盤新髻香從月裏分煙塵歸舊夢夫婿自將軍王氏牛衣願班
生燕領聞卓哉風雅主千載杜司勳

頌郡侯余鳳笙先生新政

安順

楊春霖

相有天下權祇期天下治外重二千石期治心無異嗟哉余太守烹
鮮聊小試興郡俗純良民多知禮義有美邦之媛十年尙未字玉潔

冰清姿錚錚鐵石志心早折將軍從一義不貳何物敢狂暴遽有奪
珠意鼠牙穿我塘三番復兩次豈不能斷獄顧乃迷如醉冤禽飛且
鳴百年誰同翅太守來何遲行其所無事婚禮最嚴重孰使鄭衛刺
况乃結髮情齊紈尙不棄連城總歸趙請絕秦人覬奈何狼子心白
璧必使碎秋風紫竹林美人亦無計黑夜復號訴阿爺與阿塔發覆
無遁遺卓哉臧武知團月忽放明妖菴慾何遂戴上金銀釵誰爲綴
雙翠着下碧羅裳誰爲增風致太守再造恩孰謂天無二好事出磨
折風流仍正誼儒立頑亦廉大德誠純粹待勒岷山碑千載姓名誠

岑南

王永安

誰把良緣罔作奸玉釵幾使舊盟寒鑑衡喜遇神明吏婚嫁勸勞父
母官花借春風增豔麗雲開新月復團圓從今玉斧除荆棘合有甘

興義府志續編

卷一

藝文類

十九

續編文通志局代印

棠蔭畫欄

岑南

李德潯

月川

古來循吏半名儒善政何如善教敷不使樂昌分破鏡旋從合浦返
明珠黃堂鼓吹迎花燭綠海衣冠繪畫圖慈佛心腸兒女愛頓將雀
鼠化葭葦

擬楚詞

普定

林明科

瑞芝

有美人兮真窈窕許字黃兮願已了迨其吉兮梅有標遭讒問兮心
不掉珠不抵雀兮計早鳳隨鴉兮世間少嫁弗嫁兮情默默從弗從
兮心悄悄浮雲無常兮變換人情反復兮波瀾奸猾逼嬲兮訟端手
空執法兮長嘆恨彼青蠅兮營攢憫此白玉兮難安覆邦家兮利口
傷嘉耦兮怨耦無言責兮無官守繫誰專司兮掩耳走方歡惜兮誰

是否倏忽來兮賢父母父兮母兮國之祚爲繭絲兮復保障白水盟
兮清風相狐鳴兔狡兮敢狂始視事兮如傷廉茲獄兮暴害良羌除
草兮莠稂憐並蒂兮花香堅同心之約兮嘉此翼之鴛鴦憫姘女之
無裳兮賜朱提以治妝迨其今兮飛鳳凰慰狐綏綏兮在彼其梁誰
虛前望兮貪狼得珍珠十斛兮奚償一計不就兮毒計將雲鬢逼翦
兮白雲鄉任虐楚兮蛾眉殃寸寸欲裂兮肝腸種相思兮藏舊箱欲
往從兮隔滄浪郎不來兮徬徨爺何往兮倉皇黃堂忽喚兮齊來霹
靂一聲兮春雷牛鬼震懾兮蛇神氣摧面上色兮鳩媒念往事兮塵
灰網三面兮頻開歸所天兮樓臺摩娑兩鬢兮禿其堪哀沈冤雪兮
冰在壺趨內廳兮官命嫗扶夫人劇憐兮坐以觀餽謂趁今夕之團
圓兮爲汝洗梳親手製鬢兮香油烏換樵髻之舊樣兮燕尾符左嬌

織織兮施其朱鄭婢婷婷兮進盤盂開錦筒兮新疊裾整蟬衫兮香
生膚簪翠鈿兮銀環俱樵青驚訝兮帝天呼步潘妃之蓮兮弓影如
人意兮彼姝方朔一笑兮細君娛是物合付黃子入之畫圖正九秋
可之中句兮華月甘同夢兮同穴感再造兮三生祝生佛兮淚傾嗟
小兒女兮命薄願夫婚覓封以踐約若非慈航之渡兮迷覺幾何不
爲綠珠之殞樓角待買絲兮繡平原萬家祝北海之深思

岑南

黃志鏞

次筆

有美一人今如何已換白苧穿青羅綠珠未墜紫玉在信是紅顏薄
命多初采陌上桑五馬欲奪志繼速鼠牙獄人貪鬼錢利翩翩太守
余下車新硯試秦宮之鏡溫嶠犀劍許合兮花未碎黑風俄起白雲
庵纒髮一刀師和南猾姦伎倆竟如此妾心卻苦郎何甘鏡照犀然

復有勞雷霆春雨手齊操牧之本是司香尉並蒂還他國色高佳緣
隱隱禍胎始千古蛾眉心不死詩題還贈嫁衣裳萬金難買御溝水
客有自南籠來者具道余鳳笙太守新政因傲柏梁體以紀其
事

楚南

方元杰

燭青

有美有美事可揚德政一段喧遐荒張家有女許黃郎黃郎玉立身
材長發矢能穿蝨與楊魏營馳馬邁尋常張家女兒傾城廂秀姑閨
字字芬芳意態流麗雜端莊芙蓉露池映朝陽效他故事選東牀文
定早已受烏羊會逢阿母病膏肓一朝逆甥稱兇觥秋波明媚窺紗
窗心願與子歌偕臧標梅道吉期未遑巴勒子弟何輕狂以金賂其
女族狼欲令圓鏡分樂昌孔武憤懣訴公堂前郡詎無秦鏡方掀天
力乏讞乃殃白玉埋冤絕瞻望包公大氣何磅礴鐵面秉政肅秋霜

官令山崩全鴛鴦羣魔見之皆悚惶正義充塞彼穹蒼移風易俗整
紀綱鬼蜮施技殊難防乃者復以毒計將逼令翦髮烏油香白雲虛
裏選佛場寒心莫問舊衣裳已抱袈裟換補襦廿四番風花信忙再
上琴階剖肝腸菩薩見之悲且詳豈惟兩目怒金剛巨礮一聲妖鳥
藏庶人原不樂宋王觀者快心刑者瘡朱符鐵判誰敢猖新人啼痕
顏色涼禿鷲再拜夫人旁夫人梁鴻官孟光同一垂憐心暗傷手親
製鬢時倉皇鴛髻蟬鬢形交相玉釵斜彈翡翠翔繡袂紅裙鏗鳴璫
雪庭嬌息神亦颺調脂勻粉笑相商詩婢近前暗較量何來塞上逢
王嬌主人爲汝惜文章天孫甯憚錦七襄一門風雅裁琳瑯拔宅神
仙騎鳳凰妾何福緣來瑤房敢與尹邢鬪新妝但願黃郎超騰驥大
雪積恨娛笙簧妾身萬死恩難償况當鼓吹助鸞鏘太歲辛巳九月

良小庭月滿森彩芒爲問青鸞對舞雙可曾往事憶徬徨好官卽是
慈爹娘南籠何幸得甘棠龍井泉清綠海湯代彼都人歌無疆

張秀姑行

岑南 張炳瑩 墨莊原
名鎮中

風迴六出雪花豔攪動鄉思心一片寒窗呵筆欲尋詩萬里彤雲空
際漫磨煤少注撥鴨爐朔風蕭颯入庭除玉龍紛鬪無休息展紙閒
吟張秀姑秀姑秀姑何其秀珠泉清潔椀峯瘦花魂月魄少嬌疑豈
蕊有花香薄透天生麗質珍惜宜秋水爲眸遠山眉年當三五及瓜
期許與鄰家黃氏兒黃氏兒素善騎射挽弓環甲將軍榭鄴下黃鬚
何足云面貌擬將雲臺畫生產不治困英雄周郎計妙苦東風斐航
玉杵人間無求漿孰與雲翹通挑動惡魔欲擊起狼狽謀成婚媼悔
圯族潛通敗誓盟地久天長情無語可憐花幾溷泥塗阿嬌非願金

興義府志續編 卷一 藝文類 二十一 興義府志續編同代四

屋居私易荆釵並裙布寶粧逼駕七香車黃氏兒怒毛髮動撫劍捫
胸呈詞控太守廉明清且賢鬼計冤情悉如洞憐彼嬌癡無知識珊
珊仙骨玉爲質哭訴鴛鴦不忍分圯族強爲李家媳冰人藉彼民父
母情始情忠心亦苦紅絲握定無煩言萬家生佛嬾往古愧非白雲
與陽春空將巴里歌神明巡簪且共梅花語笑殺青衫難爲情

岑南 張炳榮 寶堂原
名鎮午

張家有女名秀姑嫋嫋婷婷十五餘兩小無猜幼卽字上頭夫婿黃
家駒翠髻雲鬢住若耶碧玉年華正及瓜春風永巷無人識苞結香
含葦蕊花花知解語暗魂消名動東吳大小喬何物鬼蜮視而且強
欲纏頭羅阿嬌嬌癡不識黃金擲又何鳴張瞞改適斐航將執玉杵
來昭君幾抱琵琶出我郡幸來賢太守魑魅魍魎懾奸魄舊政新政

事兩歧從一面終義最得罪風忽起不及防一握烏雲翦粹倉慘極
蛾眉過浩劫渡迷還是舊慈航寶裝更助七香車完璧捧歸相如家
成就神仙新眷屬銀燈燦爛月光華簫簫彩幟喜盈門口碑傳頌人
衝恩狂吟不覺迴風作雪花飛豔落瓊鐙

詠張秀姑讞呈鳳笙師二律

貴陽 鄭玉麟 綠堂

矢死無他志早堅多金任是費周旋龍泉久暗珍珠井鴛牒寄稽碧
玉年南國有賢消鬪雀西風祛怨不鳴蟬菱花已覺重圓慶余靖先
誇玉斧懸

幾傷玉碎與珠沈祝髮誰存毒虺心自昔傾城能賈禍畏行多露總
難侵狂且折柳成虛牝天女拈花笑解簪最是詩人憐綺袂魯男何
事說難禁

古歌一篇奉寄鳳笙太守

鳳凰廳 鄭鶴 春江

吁嗟乎世間尤物天所寶野魅山精思探討飄風急電逞神姦秦鏡
溫犀施惠保連城歸趙物議平頌聲已徧黔南道頌者歡呼胡爲乎
張氏有女字秀姑若蘭才思靈芸巧芙蓉如面玉如膚雀屏偶中黃
氏子騎射當行美丈夫兩情私謂欣得耦久將明珠綴羅襦何物狂
徒來李賊依倚惡黨漁美色圯族張五利多金忍將紅絲繫鬼賊由
此雀鼠起波瀾悠悠不決經數官余公鳳笙楚才子一麾蒞守志懷
安夜半焚香清案牘拈毫覽卷發長嘆自古媼盟重一諾翻覆寧教
舊約寒公堂讞定仍歸黃貪心不死李與張雍姬逼爲優婆塞祝髮
空門事梵王太守風聞心垂憫願作蹇修代平章傳呼張女入內署
夫人製鬢理新妝彩輿舁歸江夏宅簫鼓錦旛助風光婦子倚門同

太息世間公道此時彰我聞其事憮然思小試何足爲公奇異端不
作民慝少祝公上爲長城限華夷

長歌一守呈鳳笙太尊

岑南 景方鑑 鏡湖

子野聞歌喚奈何滔滔皆是委流波德政碑多懸貝嶺惠州今始有
東坡英雄自古憐兒女至情所至各得所陰陽和順風俗移祇此一
心速如許婚姻速獄此偏多劫運剛回大道頗毋折我柔兼我杞鄭
詩乃見守張娥張娥嬌小秀在骨刺繡依娘住詩偏月地花天偶現
身爭驚海上來紅拂玉幣鴛盟早訂黃紫櫻花下識檀郎雕弓日射
盤空鶚未省東風故故狂禍生肘腋殊怪絕蜚螂想汚胭脂雪烏孫
詎肯嫁胡夷電火何堪暗列缺豈是殘叢少主人強移偷折不成春
羊裘幾誤奴家事不放手孫渡漢津經年鶴鶴銜冤鳥腸斷故枝三

匪繞太守新遷北溟翁秋月岑南一輪皎片言寬猛憎妖魔趙返連
城日返戈蛾眉含笑青天近官賜銅錢一萬多尤物招尤務昏晝滅
頂不毛佛頭妬老尼暗喜得新尼魔障懺除波羅咒復勞說法大慈
悲三尺珊瑚補未遲快心槌碎鐵如意終把西施拌范蠡婚喜得珠
還得橫昨會龍華今象服後堂許拜李夫人執斧何當黃山谷梁鴻
一見五隱時親爲簪花襯鬢絲桃嬌最宜誰醜白分來道韞雪中詩
維鶴在梁不濡翼裙袖飄飄稱華飾悲摩頭上歡眼前今夕何夕皆
公德曾聞名士美人風司馬文君雅趣同豈獨愛花顏色好三重四
德重初終束籬好當黃金屋江夏筵開人如菊門前簫鼓彩旛盈何
幸叨分君子福再造殊恩戴死生滿城爭唱麗人行魯男不可展禽
可大雅真儒總爲情棠陰密密秋蟲伏咳唾九天駭耳目吾郡金鐘

山頂高夢寐期之晉羊叔

張娥行

平江鄞 郇仁熙

張娥十六貌如玉豔名傾動黃金屋彼何物哉鬼中繡私心計之類
宋督誰識蛾眉甘牛衣不顧珍珠來百斛鴻蜚冥冥弋不休剝膚近
牀燎難撲壯士無顏髮衝冠雀角鼠牙速我獄壯士黃家美少年抱
屈公堂洎盈刳木來兩小久無猜有水不活魚比目琵琶慘抱幾錯
彈五馬大夫誠石木適來賢哲公孫僞傷心再效秦庭哭戎服早已
相端詳敢因謠啄有翻覆至是添絲穩繫之西施含笑暗捧腹好待
良辰賦定情休訝司空見慣熟母何鳩煤望頓虛不能膺款充珠楨
毒手遂持快翦刀預留地步供虎逐快翦一刀辮髮落脅往尼庵如
風速此際魂迷陰山雪首如飛蓬倚紫竹呼天乞死不得死黃犬信

興義府志續編

卷一 藝文類

二十五

興義府志續編

音還絕陸妾知郎已奮空拳合歡牀上難同宿郎可念奴命太苦除
卻相親在蕉鹿母也天只不諒人生佛在上再披牘黃河一笑包龍
圖春筍雙憐蘇玉局仍圓汝鏡伐我柯綢繆今宵可共卜堂下堂上
鶉鶻歡血碎片片鶴鷓肉汾陽侍婢引花入雨雹傷痕待膏沐如皋
笑言雉無尾傷哉何衣安且燠雲母虛窗玉女環明妃新髻忽雲蟲
壽陽分點絳梅妝彩鸞吟毫補眉禿洛靈解珮姜脫簪玉搔頭上鳳
凰簇越羅衫碧湘裙紅濫錦潘連相齊蹴蔡女既贖骨肉稀可堪憔悴
無險蓋臂如三鼓助元戎有梁夫人聲容肅霧黑霞光頃刻間春色
人問三十六嬋娟於乃拜東皇仙步姍姍秋波蹙奇緣奇景可憐
宵香風吹滿桃花谷金鐘山下鼓吹聲還助新人房中曲君不見一
部鼓吹還助新人房中曲

張女行

余昌瑛 選秋

花折不久榮供佛可長生
長生與否花不自主隨風飄
舞子寧不來誰與同處君
不見張家女一解張家女
字秀姑納黃幣兩美俱郎
手能挽百鈞弓不能救我
嬌芙蓉二解非不能救防
人妬衙門可是若生路若
生路苦難必孔武有力總
不及鴆毒之煤鬼伯之財
含沙之蜮三解且忍氣吞
聲青天之外天更青夜又
放手牛頭不放手吳道子
一筆復盡懾其醜絕頂不
毛嗟彼蝥首四解月老斧
之天老照之有續其雲媧
皇補之有豔其妝絳仙拊
之粲粲者裳珠翠組之彼
其之子何以嫵之五解

張黃訟平偶紀六絕句

崇慶 劉沛元 謝棠

明珠翠羽一番新著溷輕花忽著茵
莫把蛾眉驕鄰女誇儂曾鬪尹

興義府志續編

卷一 藝文類

二十六

興義府志續編

夫人

幾墮泥犁命太艱
姮娥應悔謫塵寰
廣寒一自身經過
不竊金丹亦換顏

縱令一曲跨駝行
不怨匈奴與壽卿
妾有樓西梁氏計
白雲庵裏尙偷生

重圍回首陣彌奇
庾亮登樓卽退師
奪得胭脂顏色豔
少年還算獸隣兒

弄玉居然反弄人
多虧青鳥巧偷春
風流結得憑空孽
信有人間百萬鄰

青衫黃土問垂楊
世有雙文祇等常
誰勝胡笳十八拍
百篇詩裏姓名香

詠張秀姑詩四首

岳陽 余厚埔 堅甫

有美娉婷嬌可憐蓬門深閉待良緣聰明慣學阿爺技騎射爭誇得
堦賢禍水那知波疊起冰輪無計影重圓瓣香稽首慈雲座一指誰
參解脫禪

新來太守是詩人操鑑無私愛物真白晝燃犀堪走怪黃堂判牒已
如神冤沈海底經三載讞定山崩動四鄰那識落花飛絮苦無端又
被冷風颯

縝髮并刀一剪輕白雲庵裏許飛瓊重繙鴛牒稽前案靜禮華嚴對
短檠忽聽疾雷呼哮虎頓教幽谷出春鶯新尼可許稱新婦頻拭噉
痕慶再生

雪涕翩翩出洞房大官先製嫁衣裳笑梳燕尾添新樣學畫蛾眉奪

興義府志續編

卷一一 藝文類

二十七

興義府志續編

舊粧醪酒合歡和細菊好花培護當甘棠買絲繡就黃金鑄綠海恩
波萬丈長

奉題鳳笙太守判張秀姑事

調寄賀新郎

善化

張

絢

元素

誰補情天罅好重繙月中仙牒便成佳話見說雛鬢年十五選堦窻
開芳榭有幾輩雀屏爭射不信少年同碧鶴卻相逢絡秀心先嫁溫
鏡在老奴詫 如何蜂蝶問鈎惹枉明珠豔誇要佩山頭石化坐使
蟬雲判一剪早擬塵緣懺罷看太守鴛鴦判下此日朱旛爲導引似
玉堂歸娶金蓮借兒有子合名賈

附聯語

試院聯

韋業祥撰

二十年瑣院重開觀國用賓願與黔疆培土氣

八千里盤江飛渡臨流叱馭早將白水矢臣心
復羣飛鳥革之觀廣厦千間所賴文翁興教化
攬珠水梳峯之秀士風重振豈徒道甫奮科名

府署聯

余雲煥撰

紅羊劫後黃鳥集餘到今日欲起瘡痍奈傷元氣
撫字心勞催科政拙願我民早完國課共體時艱

興廉舉孝

義種禮耕

不要百姓半文錢原非異事

但問一官二千石所造何功

養花莫到深紅候

飲水須防過滿時

湖廣會館聯

余雲煥撰

同是宦游人客思暗縈衡嶽雁

大好故鄉味何時歸釣洞庭魚

界粵嶺滇池之兩間于茲造福

秉洞庭衡嶽之秀氣維楚多才

養濟院聯

余雲煥撰

養民也惠

濟衆未能

申明亭聯

余雲煥撰

申以孝弟

明其政刑

十八先生祠聯

屠漢章撰

天意竟難回遂使奸雄殘善類

祠堂今再闢要教頑懦式儀型

又

劉不助撰

大局已殘三百載王綱墜地

孤忠自任十八人佛誕昇天

又

徐以清撰

天道原來不可憑獨鑿十八孤臣共整綱常忠貞足與河山壽

人生自古誰無死于今二百餘載重新祠宇俎豆長留姓字香

又

余雲煥撰

興義府志續編

卷一 藝文類

二十九

興義府志續編

南荒殘祚可延乎誰教厓島孤蹤忽變青天成黑獄

西府援兵不至矣太息田橫壯士同濺碧血滄紅江

又

余厚塘撰

天命將安歸十八人戡亂圖存盼到雄師西府不來頭已斷

大劫幾經歷數百載忠魂宛在重新廟貌南籠有物草皆春

取義成仁志士臨之當爲不奪

頑廉懦立先生死矣其實猶生